

四庫全書

經部

欽定四庫全書

經部
四書管窺卷七

詳校官給事中臣丁雲錦

刑部郎中臣許兆椿覆勘

總校官進士臣朱鈐

校對官編修臣邱庭澧

謄錄監生臣慕湘文

欽定四庫全書

四書管窺卷七

元 史伯璿 撰

中庸

第十二章 輯講問章句云然其理之所以然則隱而莫之見也則似乎費外別存个隱要之鳶飛魚躍則道體昭著又豈終隱而不可見耶所以先生於鳶飛魚躍之下只云以此證用之費而體之隱在其中說得大段

分曉饒氏曰章句所以然三字已是親切但於幹旋之語更少圓耳蓋章句不合謂章內專說費而不及隱所以如此下語又曰此章前面說費未見得隱及引鳶魚來證方見

按或問有曰隱之為言正以非言語指陳之可及耳故獨舉費而隱常默具乎其中若於費外別有隱之可言則已不得為隱矣詳味此意則問者所謂似乎費外別有不隱之疑此人正是不識所以然三字之

旨者所以然是太極之本體太極不離乎陰陽而亦
不雜乎陰陽費即不離乎陰陽之太極隱即不雜乎
陰陽之太極耳不雜者即不離者之所以然初非有
二致也但所以然者則無聲無臭故隱而不可見爾
章句以為不可見正以其無形像之可指陳雖鳶魚
之飛躍亦但其飛其躍之可見其所以飛躍則唯可
心悟而已又何嘗果有形像之可指陳哉然則問者
之所謂豈終不可見饒氏之所謂可見果能見其形

像之何如否乎蓋朱子之所謂不可見正是目無可睹之謂饒氏師弟子則直以可以意會而無可目接者為可見所主不同故如此誤耳又饒氏證用之費而體之隱在其中的說何嘗不便是朱子意問者是其師說而疑朱子蓋亦逢雙峰平日好求加於朱子之意耳雙峰却又謂章句不合說章內不及隱然則便以鳶飛魚躍為隱可乎其不顧文義專務立異亦已甚矣

鳶飛魚躍 發明理無形體於有形體之物上見得無
形體之理此察字實對隱字體之隱者於此物上昭著
出來則隱而不可見者察而可見矣而其所以然之妙
則終非見聞所及雖察也而實隱也 輯釋亦引之

發明蓋勦饒氏之意而刪潤之以為已有一以求合於
章句之旨者也既辯饒則不必辯此矣但其曰察對
隱字隱者於此物上昭著出來者饒氏意也其曰而
其所以然之妙則終非見聞所及者章句意也其曰

雖察也而實隱也者推饒說以合於章句之旨者也
然察之一字朱子是指道之用言而隱在其中發明
以為專對隱言此則終不可得而強合者也讀者詳
之

鳶飛魚躍或問記程子之言以為子思喫緊為人處與
必有事焉勿正心之意同活潑潑地

或問中發明此意已無餘蘊而讀者每猶有所未達
此不過皆是形容天理流行無滯礙之意而已其在

鳶魚則鳶魚無知之物然飛必戾天躍必于淵是誰使之然哉道之體用流行發見自然而然有莫知所以然者又豈特鳶魚為然哉所謂天理流行無滯礙之意於此固為易見其在人心則人心不能無私天理易至間斷惟能以集義為事則天理無時不流行矣又無預期其效之心則自然無所滯礙矣天理既流行而無滯礙則與鳶飛必戾天魚躍必于淵者同一活潑潑地之意可識矣若不以集義為事則如鳶

魚之不能飛躍謂之天理流行可乎若集義而預期其效則如捉鳶魚使之戾天躍淵皆不出於自然謂之無滯礙可乎天理不流行而有滯礙則不得謂之活潑潑地明矣

夫婦之愚不肖能知能行章句近自夫婦居室之間又曰可知可能者道中之一事發明姑舉其一事言如事親事長之類

竊意一事即是夫婦居室之一事章句明指此事而

言觀於或問亦以男女居室人道之常為說可見不
必外引事親事長為證也或謂事親事長之極致處
愚不肖固有所未盡其粗處夫婦雖愚不肖亦豈不
能知之行之邪居室之正所謂苟或褻慢則天命不
行者又豈愚不肖之夫婦所能盡哉其所知所能者
不過男女情欲之私耳然則雖以事親事長為一事
之證不必以居室為拘可也愚則以為此處言知言
能皆是真能知之行之者初非泛知泛能所可當也

若以泛知泛能可以當之則聖人於道之全體又豈
有不能如愚不肖之泛知泛能者邪事親事長之道
正是下章君子之道四中所求乎子弟以事父兄未
能之事章句以為聖人所不能者而謂愚不肖泛泛
之知與能足以當之乎男女構精形交氣感雖若鄙
褻不足道然真精妙合自是造化流行發育生生不
窮之蘊奧以愚不肖之夫婦他無所知所能而獨知
此能此蓋與鳶飛魚躍同一機緘故章句或問獨以

此當所知所能之一事其意精矣初未說到藝慢處也

天地有憾章句如覆載生成之偏 發明天覆而生物地載而成物以天無私覆地無私載而生物成物或有偏而不均者

按或問謂天能生覆而不能成載地能成載而不能生覆其說覆載生成之偏似與發明不同讀者詳之饒氏謂費隱章前面許多說話都是說費如此則似乎

人力安排越外討來底不見得是天命之性所以說君子之道費而隱畢竟有體所以用如此費

饒氏唯謂中和以性情言中庸以事理言性情與事理所指各異中庸之中不兼中和之義只是時中故於此只得費辭以分疏之耳若只從朱子之義則此章前面說話皆自體上發出何至有似乎人力安排越外討來者邪又況此章以後皆隱在費之中則以前諸章何獨費中不得為有隱可直至此乃補具闕

邪通者一段議論極精雖不為辯饒說而設却深可以破饒說之失今撮其大旨與此意有相關者于此其言曰中庸言道字皆自率性之道說來費即率性之道隱即天命之性才說費隱便在其中纔說率性之道天命之性即在其中非有二也首章言天命之性率性之道自第二章以至第十章無非率性之道亦無非因其天命之性也詳此則朱子之意可明雙峯之誤

可釋矣愚謂率性之謂道只率性一性字便是用中之體所謂隱在費之中者不然天下豈有無體之用哉率性之性非即天命之性而何但以天命之性率性之道對言之則一體一用所謂兼費隱而言者也只率性之謂道一句便見得費中有隱之意雙峯能言前面都是說費敢言道不是率性否乎請試思之

饒氏謂云云知道之用費而無所不在則吾當有以致

察乎其用而不可使有一毫之不盡知道之體隱而無所不在則吾當有以致養乎其體而不可使有一息之不存不然則是道雖不可離而私欲間之吾實離乎道矣此君子所以戒懼而謹其獨也又謂章句云費隱是申道不可離之意然道不可離是無時不然此是無物不有不是以此申彼首章性道是說自家底此章費即道隱即性是萬物公共底

此說前段分明與章句無異後段又自背之合而觀

之不唯可見自相矛盾抑亦可見是非得失之真至若後段所言之差則已於前屢辯之矣唯謂自家公共之分別則異乎吾所聞也知天下無性外之物而性無不在者詎容以此為同異耶

通輯釋引熊氏曰此章有大小費隱四字大處有費隱小處亦有費隱

此意不分明且似有病若曰大處小處皆是費而隱在費之中則庶乎可耳

第十三章以人治人 通引袁氏曰不曰我治人而曰以人治人我亦人耳入道不離吾身亦不離各人之身吾有此則人亦有此則以則取則天則自然非彼柯假此柯之比也 輯釋亦引之

按章句曰則所以為入之道各在當人之身初無彼此之別故君子之治人也即以其人之道還治其人之身詳味此意正如程說覺後覺後知以為及彼之覺亦非分我所有以與之彼皆自有此理我但能覺

之而已之意相類袁氏既謂不曰我治人又謂我亦人耳既謂人道不離吾身又謂吾有此則句句以已對人而言且以以則取則之言繼之上則字分明指在已者言下則字分明指在人者言措辭不瑩反若與彼柯假此柯比者無異正與章句之意若相反然者讀者詳之

改而止 饒氏謂言治之不過其則也又謂且如人不孝得他改而從孝便足矣如何便去十分責他便如堯

舜之孝蓋其人去道已遠了得他改却有漸進之理
通謂以衆人望人不敢遽以聖人責人也 輯釋亦

引通說

饒氏與通之意可以發明章句以衆人望人之說乎
曰不可以發明或問遽欲盡道以責於人吾見其
失先後之序違緩急之宜之意乎曰亦不可何則蓋
章句之所謂衆人非庸衆之衆雖堯舜之聖亦衆人
中之人耳正如詩所謂烝民之意改非略改而不必

至於至善之謂若但略改而即止則孝不必十分孝
忠不必十分忠皆可止邪殊不思雖堯舜之孝亦不
遠人之道爾孝未至於堯舜便是為子之道有所未
盡便是有所未盡改雖亦勝似不孝者又如何便自
以為足中道而止得所以雖夫子之聖猶自謂所求
乎子以事父未能也夫子豈未能略改者邪又豈可
止而不止也邪雙峰每有此等議論如說止至善說
格物之類是已以此見得二說不可發明章句之意

也或問所謂先切身而後不急乃行遠自邇升高自卑之序與不可盡道以責於人者蓋謂語道之全則有萬不同其間有緩有急人倫日用之常行者其急也天地聖人之所不能盡者其緩也人之為道當先急而後緩耳以饒說較之則譬如斯道之用當有十件每件之中又有十分以十件言之則有緩有急或問之意是欲人先其十件中之當急者非謂每件之中不必盡十分也以十分言之則盡得十分方是

至善方可謂之能改方可以言止饒氏之意是欲入於每件之中改得一兩分亦可止改得三五分亦可止不必到十分然後止也以漸而進固有此理但說止字未得以此見得二說亦不可以發明或問之意也讀者詳之

饒氏謂施諸已而不願二句是恕之事君子之道四一段是忠之事庸德是孝忠弟信之類庸言即所責乎子臣弟友之類先言恕而後言忠語意尤有力 輯釋亦

引此說

雙峰以勿願勿施二句為恕之事與章句微異語錄
辯此已詳通者兩存而不為折衷何也蓋恕由忠出
忠因恕行初無二致盡已之心在內本不可見善觀
者却於推已之際觀之則盡已之意可見矣且如施
諸已而不願不願之心固非有不真實者是則不願
者已之真心也此真心非忠之未發者乎及其推以
及物亦即以此不願之真心而勿施之則發於已者

豈有一毫之不盡乎此即忠之因恕見者然也以已之不願者推之而勿施於人此則恕之由忠出者也章句合忠恕而言至矣饒氏蓋未之思也饒氏又以君子之道四一段為忠之事此則別有愚見當續論之庸德之說亦然若夫以庸言為所責乎子臣弟友之類則恐未然章句謂凡已之所以責人者皆道之所當然也故反之以自責而自修焉今日庸言即所責乎子臣弟友之言則是以已於當然之道有所未

能而遂不敢盡以當然之道責之子臣弟友此正范氏以恕己之心恕人之誤曾謂聖人言之乎要之只是於當然之道有所未能則不敢易言之耳通者盡撫饒說以為已意既辯饒則不必辯通矣

饒氏謂此忠恕是夫子告曾子以一貫而曾子告門人以忠恕而已矣之意子思又得之曾子故於此發明之盖忠恕二字說得闊做得徹便是一貫通者亦為此說以為已意

已於論語一貫忠恕章辯之此不再述

饒氏謂章句云丘未能一者聖人所不能竊疑丘未能一孔子之謙辭也似與子思所謂聖人有所不能小異按論語志學章集註有曰聖人非心實自聖而始為是退托也後凡言謙辭意皆倣此知此則雖謙辭亦不害其為誠心况如舜之孝猶以事親自知不足為心夫子之心即舜之心也曾謂聖人謙辭皆實無此心而虛有此言乎哉章句何可疑之有

饒氏謂此段夫子責己以勉人之意前四語是責己庸德以下是勉人

竊意此段皆是夫子責己自勉之辭而教人勉人之意在其中上曰四者未能責己之意也此便是若聖與仁則吾豈敢之意皆聖人不自聖之謙辭也苟未能而遂已焉則亦徒責而已故以庸德以下以見自勉之意此便如抑為之不厭之意皆聖人純亦不已之誠心也合而言之可見聖人不自滿足終日乾乾

之意矣聖人尚爾況學者乎則其教人勉人之意豈必外此而他求哉

君子胡不慥慥爾 章句言君子之言行如此豈不慥慥乎贊美之也 通謂胡不二字即盍字

按盍者何不之謂何不與章句豈不之意不同何不是未能如此而責其何不如此之辭豈不是既能如此而贊其能如此豈不為美之意言行相顧蓋是已能如此而非未能如此者故章句云然通者不詳文

勢但欲牽章句之意以合於饒氏勉人之說殊不知實不得饒氏之意而徒失章句之旨也

全章之旨

按饒氏頗疑章句張子之說分作三截不相貫串故其所自為說者多與章句不同其間顯然差失者愚已標出辯之於前矣其有與章句相似者則在所不抄其有雖非章句正意而亦近人情若可備一說者則錄之於左仍採語錄與之相類者與相附近以備

參考其有未備者則妄以愚見足之於末以求正於
知道云

子曰道不遠人云云不可以為道

章句至矣

詩云伐柯伐柯云云改而止

饒氏謂此引詩而說之以明道之不遠於人而人不
可遠人以為道者如此又謂以此引頭聚要處只是
說忠恕遠道不遠又謂以人治人只是借此來說不

可遠人以為道而為下文張本不須別作一條說
案章句以衆人望人之說則以人治人之人字是
指所治之人而言如饒說則以人治人之人字是
指自治者之身言蓋上節人之為道而遠人之人
字亦是指自治者之身而言如此則饒說雖非章
句之意恐亦可備一說又案語錄推以人治人之
義有曰以我自治其身亦不是將他人底道理來
治我亦是將我自得底道理自治我之身而已詳

此則饒說雖不同於章句要亦朱子所已論之緒餘也竊意道不遠人之入字只是以人對道而言道便是人之理人便是人之身初無以人對已之意下文人之為道而遠人兩人字皆指為道者言可見人即已爾故此節兩人字雖不必以為對已而言亦可也只因此上有君子二字則似乎此人字對君子言之者故章句順文解義以此為君子治人之事

按中庸
自首章

至此皆言自治之事直至二十章方言知所以修身則知所以治人為天下國家矣

其實上人

字是入之道下人字是入之身若只以為君子自治
恐亦可通君子以人治人猶曰君子以在己之道自
治其身之意爾下文忠恕即是以人治人之工夫改
是改其待人未能如待己者也至於待人能如待己
者則不遠入之道盡矣故當止而不可過有所治也
若又不止則便是為道而遠人者之所為反不可以
為道矣

忠恕違道不遠

章句至矣饒氏謂此皆不遠人以為道之事而道之不遠於人者莫甚於此故下文即其事而詳言之竊意忠恕是盡己之心推以及人之事故己不欲而勿施於人固推己也己所欲而以施之於人亦推己也下文施諸己而不願亦勿施於人二句是不欲而勿施於人者君子之道四至先施之未能一節是推己所欲以施於人者一反一正皆所以釋此一句之義也

施諸已而不願亦勿施於人

章句曰此忠恕之事也以已之心度人之心未嘗不同則道之不遠於人者可見故已之所不欲則勿以施之於人亦不遠人以為道之事按此節章句兼忠恕釋之至矣饒氏以此專為恕之事者失之已於前辯之此不再述蓋此一節是不以已之所惡者施之於人聖賢論忠恕皆就拂已處說如夫子之告子貢仲弓亦此意蓋取其易見也知已所

惡者勿施則已所欲者自不容於不施矣非但不施已之所惡而已也然則章句自以已之心度人之心以下似可以兼說下節之旨不但可施於此節云

君子之道四云云先施之未能也

章句之句讀訓釋至矣按饒氏以此通下文皆為忠之事者失之竊意此一節亦忠恕之事是推已所欲者施之於人也所求乎子所求乎臣所求乎弟所求

乎朋友皆是求其待己如己之所欲也以事父以
事君以事兄以先施皆是推己所欲求於子臣弟
友者以及其父君兄友也四者皆曰未能可見子臣
弟友之職未易盡聖人不自聖之心盖與舜之事
親自知不足者同一意爾上文己之所惡則勿以
施之於人足矣此欲推己所欲以及人則孝弟忠
信之道有一毫未如己之責人者皆不害其為未
能此雖夫子之謙辭要亦不害其為聖人不自滿

足之誠心也君子之道即上文不遠人之道爾道不外乎人倫故以四者言之推已及人即不遠人以為道之事忠恕之事無不盡則道不外是乃為能改而可止矣故張子曰以責人之心責已則盡道蓋謂是也若移章句前節自以已之心度人之心至亦不遠人以為道之事一段置於此節之下以總釋二節之旨更添而以已之所欲者施之於人一句於則勿以施之於人之下亦不遠人以為

道之上仍改亦字為皆字則似極為明備蓋二節皆忠恕節目皆不遠人以為道之事也或疑上節亦勿施於人之人不止指父君兄友之四者此以己之所欲者施於人但及父君兄友而不他及得毋施之有所不周乎曰所宜施而不可緩者亦止於此而已若不先於所急而泛施之其不如墨氏之兼愛者幾希况親戚不悅不敢外交近者不親不敢求遠四者猶曰未能又安敢泛然施於所不

常接之外人乎如大學絜矩所惡於上毋以使下之類亦不過無所妨害於彼使彼各得遂其所欲施於父兄之心耳非欲人人皆待之如父君兄友也故此二節雖皆忠恕之事而聖賢言之亦不無詳畧於其間也殆亦以此也夫然則此四者章句但以為責己自脩之事今亦指為忠恕之事抑亦有所本乎曰觀語錄嘗以大學絜矩為此章之證則固亦以為忠恕之意矣況以為忠恕之事亦與

章句責已自脩之意無所礙庶乎亦或可通云爾

庸德之行云云君子胡不慥慥爾

章句至矣饒氏謂康德如孝忠悌信之類按饒氏以庸德為孝忠悌信之類者近之以庸言為責乎子臣弟友之類者未當已於前段辯之此蓋承上二節忠恕之事而言既又推而極之以至於盡道之域也庸德以忠恕之事為德也庸言以

忠恕之事為言也待人有一毫不如待己者便是
不忠不恕故於庸德不可不踐其實於庸言不得
不擇其可行忠恕之事難故每有不足不足則不
敢不自勉以盡其所難言忠恕之事易故每至有
餘有餘則不敢不自反以節其所易至于言無不
如其行行無不掩其言則言行於是乎相顧而忠
恕之事畢矣至此則人事盡天理得由忠恕之不
遠乎道者可以至于不遠人之道而與之一矣此

所以以胡不慥慥乎之言而贊美之也歟或又以庸
德庸言只當承上節四未能之意言庸德以四
者之事為德也庸言以四者之事為言也四者猶
有所未能故於德不得不踐其實言不得不擇其
可耳若上節已之所惡則勿施足矣故不復申言
於此也此其說德字之意正與雙峰之言有契恐
亦可通區區臆說非敢自以為是姑記於此以俟
有道而就正云

第十四章素其位而行章句素猶見在也 發明如今人云素來之意

按素來有從前之意似與見在之意不類見在乃是目今之事非從前意也今日富貴則今日行乎富貴明日貧賤則明日又行乎貧賤此之謂見在觀或問善游氏引舜飯糗被衿為素貧賤富貴之證可見若以為素來則昨日富貴今日貧賤反仍素來可乎章句唯如此說素字故以君子無入不自得屬上節為

素位而行之事讀者詳之

素富貴貧賤夷狄患難 通引倪氏曰順居一逆居三
以見人少有不經憂患者 輯釋亦引之

順逆之說本饒氏但曰以見人少有不經憂患者竊
恐未然貧賤對富貴言雖逆順不同皆常事也患難
却對康寧言夷狄却對中國言患難夷狄不唯是逆
又且是事之變者並言四者而常變相半者不過以
見處常處變皆無入不自得耳常變相半而順一逆

三者又不過以處順易處逆難故畧於順而詳於逆耳康寧與中國亦常事之順者耳奚假言哉若曰以見人少有不經憂患者則是人亦少有不患難夷狄者邪恐無此理

君子無入不自得 發明四素四行字正解首句無入不自得已涵不願乎外意惟自得於中故不願乎外

竊意無入字總上文四素意而言自得字總上文四行意而言此句是包括上文四句之意只當屬之素

位而行但素位而行不願乎外二句是反覆相形而
言故下二節亦反覆相應而言耳然各有所屬又自
不可紊也要之發明亦只因以見在為素來故於無
入之義有碍不得不如此分節耳

第十六章鬼神之為得章句為德猶言性情功效 饒
氏謂云云要之不是如此說鬼神之為德其盛矣乎與
中庸之為德其至矣乎語意畧一般所謂德者指鬼神
而言若只說性情功效則鬼神與德為兩物非所謂鬼

神之德也

按此疑一以中庸之為德為證二謂德者指鬼神而言三疑鬼神與德為兩物三者之疑朱子於或問語錄中辯侯氏等說皆已言其如此不應章句忘其所辯之意而析鬼神與德為二也今性情功效之說又未免如雙峰之疑何也竊意使章句而曰德者性情功效也則性情功效正是德之訓釋誠如雙峰所疑矣今章句則曰為德猶言性情功效上兼為德二字

言而不但專舉德字下以猶言二字起之而不但曰
性情功效可見鬼神之外別無性情功效性情功效
便是為德之意而非所以為德字之訓釋也蓋集註
章句凡曰猶言猶云皆非以彼訓此之謂如自道猶
云謙辭亦猶是爾然則鬼神之為德便如說鬼神之
性情功效一般雙峰疑鬼神與性情功效為二恐於
章句之旨有未詳也

饒氏謂道是形而上者鬼神是形而下者此章即鬼神

之費隱以明道之費隱是以形而下者之體用明形而
上者之體用也予思以道體至微未易察識故以鬼神
之事人所共知者曉人又謂鳶飛魚躍所以發明本章
之意指物以形此理之體也鬼神之德又所以發明費
隱之意引喻以明此理之實也又曰誠不可掩明此理
之實自然發見也

按語錄有曰前章論君子之道此章論鬼神之道鬼
神之道便是君子之道非有二也詳此則饒氏謂以

形而下之體用明形而上之體用者非也又按語錄
曰此段上下章恁地說驀忽插一段鬼神在這裏也
是魚躍鳶飛之意詳此則雙峰以鳶魚為指物鬼神
為引喻者亦非也又按語錄問體物不可遺曰只是
一个陰陽有是理便有是氣有是氣便有是物無非
實者詳此則饒氏形而上下之分別尤非也蓋鬼神
是陰陽之靈更其體物不遺洋洋如在便是用之費
處而所以體物如在者却不可見聞便是體之隱處

此費隱即道之費隱其何可以形而上下分哉且如
鳶魚豈不是物鳶之飛魚之躍亦只是器未可謂之
道然鳶飛必戾天而不入淵魚躍必于淵而不戾天
這便見此道之用自然而然處即此推之則鳶之戾
天魚之躍淵既是道之費處鬼神之體物如在何獨
不得為道之費處鳶魚飛躍之所以然而不可見者
既是道之隱處鬼神體物如在之不可見聞者何獨
不得為道之隱處讀者豈宜無見於此况雙峰既以

鬼神為形而下者矣却又以誠為實理理非形而上者乎此正如侯氏分鬼神與德而言之失已經朱子所辯者雙峰前以此疑章句既不審矣而不免躬自蹈之讀者合或問紀聞而觀可也雙峰指物引喻之分別正如大學說心在是借粗以明粗未便是心正者相似皆是穿鑿之見不可不察竊觀中庸一篇凡有引喻所在未有不明言之者如行遠自邇升高自卑與天地之持載覆幬四時日月之錯行代明一則

曰譬如二則曰譬如豈有以形而下者喻形而上者
乃不明言其取譬之意邪不知識者以為如何

饒氏謂章句以體物為費者不然體物不遺言其實有
也齋明盛服以下方是說費

費是用體物不可遺正是鬼神之功如何不是費
齋明盛服以下正是體物不可遺之驗如何彼得為
費此不得為費

輯講問此章鬼神本是說隱章句却引程子造化之迹

而言既曰迹則不可言隱饒氏謂程子之言別有所指
朱子引之於此則粗了

饒氏別有所指之說蓋謂程子以易中有言鬼神處
有言神處故如此分別然則所謂鬼神與易中所謂
鬼神不同邪天下不知果有兩樣鬼神否只因雙峰
以鬼神之德為形而下者故無以答問者之疑只得
歸咎於朱子之不當引耳却不思問者所謂此章鬼
神本是說隱者本非經旨蓋此章鬼神兼費隱說然

則為造化之迹者便是體物如在處此固是費而所以為造化之迹者便是不見不聞處豈不是隱雙峰不知以此答之而歸咎於朱子之不當引豈不誤哉發明引饒氏曰子思似知後世有佛老空虛之禍特特地說出个誠之不可揜蓋佛老底亦微然只是空虛無誠之不可揜一節此其所以為異端

子思不過以此明費隱無非實理之意未必逆知佛老之禍而預設此為之防也自古聖賢格言何者不

切中後世之弊不必如此臆度之也

章句曰此一章兼費隱包大小而言 饒氏謂此章貫前後六章之旨章句謂包大小管見謂包字似不若言貫大小

朱子下一包字其意甚廣蓋事物物莫非斯道之用前後六章雖說費之小大而所該有限故此一章說費處初不分大小其言體物不可遺所該極廣凡天地間道之用處無小無大莫不包於其中固非專

主前後六章而言也但前後六章費之小大亦包於其中爾若以貫字易之則狹矣

發明此章包大小者體物不可遺所該甚大以承祭祀士庶所祭亦是祭祀茲非小歟 輯釋記先師曰包大小者體物而不可遺總而言之所該甚大即一物言之亦鬼神實為之體茲非小歟以承祭祀天子祭天地大也士庶所祭亦是祭祀又非小歟

按發明以體物不遺對士庶所祭為大小之分又是

本章並有此二義可以言兼不可以言包恐未得章句之旨而輯釋所引師說專以體物包大小者其義甚精殆非發明元說之比但以承祭祀以下則不必如此分可也蓋祭祀既是體物之驗但當統在體物之中不必於此又分其大小也况十二章前言大小大是全體小是一事天子祭天地亦一事之大者耳非全體之大也豈可以此為費之大者乎餘於二十章言之

第十七章舜宗廟饗之 發明宗廟亦是舜子孫宗廟
舜沒為神明祀享其中所謂盛德必百世祀是也又引
真氏曰舜以聖德居尊位其福祿上及宗廟下及子孫
所以大孝

按宗廟之說發明與真說不同以下章宗廟饗之之
下即繼以追王上祀之言觀之則真說當矣如發明
之說則夏孔甲商武乙周幽厲既沒之後何嘗不在
宗廟中享祀邪亦以為大孝可乎

必得其壽章句舜年百有十歲 發明引陳氏曰得壽不但百有十歲宗廟享子孫保亦得壽之類

陳說求奇牽合非經註旨發明以其與盛德百世祀之說相近故引之耳其實未必然也

章末章句曰此由庸行之常推之以極其至見道之用廣也 通謂庸行之常筆誤當作庸德之行蓋上章言庸德而此章言舜大德下章言周公文武之德皆由庸德推之以極於至也

筆誤之說將有所考邪抑自意之邪朱子平日極精細不應於此有誤況後來更定不一果誤豈有不知之理縱未及改亦安得無一言及之而及門高弟亦皆不之覺何邪意者前言庸德之行緊要工夫在行字上下曰言顧行行顧言又可見行之為重故此不曰庸德而曰庸行耳常字對下句至字又有意味通只因欲德字以類相從故以朱子為筆誤耳恐未必然

章下章句曰此由庸行之常推之以極其至見道之用
廣也 發明庸行之常孝也推之以極其至大孝
也

庸行之常固指孝言恐亦是以十三章庸德之行與
此對說以見費之小者推之以極其至即所以為費
之大也故曰見道之用廣未知然否

第十八章武王纘太王王季文王之緒章句曰至于太
王實始翦商 節齋蔡氏曰太王雖未有翦商之志然

太王始得民心王業之成實基於此

蔡說與論語泰伯至德章集註相反饒氏以下蓋皆
蹈襲其意以立異於朱子已於彼章辯之此不再述
武王未受命章句末猶老也 叢說末猶老也終也蓋
自太王王季文王累世積德累功最後至武王始受天
命如此說末字則與上下文都相貫穿訓末為老恐未
安蓋武王之齡古書不一

叢說固亦可通但章句所以訓末為老者蓋以下文

即言周公成文武之德追王上祀見得武王老不暇
及沒後周公乃成其志也武王之齡古書雖不一然
以金縢考之則武王克商不多年即崩亦自可見况
叢說之意已該在上節武王繼太王王季文王之緒
一戎衣而有天下處此所謂武王未受命一句不是
結上節意只是引起下文周公追王上祀之意而言
耳然則末字從章句之訓何未安之有

第十九章達孝章句言武王周公之孝乃天下之人通

謂之孝猶孟子之言達尊也 輯講問於舜言大孝於武

王周公言達孝何也饒氏曰舜之孝是指其克極一家者言武王周公之孝是指其放乎四海者言達者是承上章三個達字而言舜孝只孝一家到武王也只做得舜之孝到周公便推得濶能推吾愛親之心而制為喪葬之禮以通乎上下使人人得致其孝故謂之達孝所謂德教加于百姓刑于四海此天子之孝也 通於上章之末曰云云此章之末數達字所以有下章之首一

達字叢說亦如此說達字輯釋亦引輯講及通之說
或疑雙峰言大孝之旨如此與孟子集註有異蓋中
庸與孟子言舜之孝所以大處不同雙峰只以中庸
之意言之是矣不必疑之也但其說達字之義與章
句異則可疑耳蓋此下文有夫孝也者善繼人之志
善述人之事一句若是他人善繼善述無大聳動人
耳目處天下人安得通稱之哉唯武王周公之善繼
善述事功極盛如武王承前緒以有天下周公成文

武之德以追崇其先祖又制為禮法以達之天下傳之後世此其繼述皆非常人所及所以天下後世人皆知其繼述之為善故皆稱其孝而無異辭此其所以為達孝耳章句訓釋無以加矣唯雙峰只以承上章三達字為達故有舜却只孝一家之言然則舜之孝反不及武王周公之孝耶唯只以制禮通上下為達故又有武王也只做得舜之孝之言然則經以武王與周公並稱為達孝者非歟至曰德教加于百

姓刑于四海又與制為禮法之意不同彼是功化此是立法不可無分別也若以德教加百姓刑四海之意說孟子大孝之旨則庶乎近之通與叢說皆是勦雙峰之意以為已有輯釋引之而自無所言蓋亦以其說為勝於章句而取之耳不知識者以為如何春秋脩其祖廟發明引朱伸曰此以下併前章論喪葬之禮皆修道之教也

一篇之中無往而非修道之教獨以此當之狹矣

郊社禘嘗 通謂周公制為禮法未嘗不通上下之情
亦未嘗不嚴上下之分祀先之禮通上下可行事上帝
惟天子得行之故特以先後言之明乎郊社之禮胡為
先郊而後社郊惟天子得行之社則上下可通行也明
乎禘嘗之義胡為先禘而後嘗禘惟天子得行之嘗則
上下可通行也但言周公制禮如此而不足於魯之意
自見 輯釋亦引此說

此因河東侯氏之說而推廣之也侯說朱子不存於

章句或問恐不當述之以為已說也且郊祭天社祭地天尊地卑故先郊而後社爾禘天祭嘗時祭禘大嘗小故先禘而後嘗爾此皆當然之序不得不如此者不知有何可疑今既曰胡為先郊而後社又曰胡為先禘而後嘗疑問之意若可駭異然者及至說出所見乃不過如此今亦不在多辯不知假使聖人無不足於魯之意則又當以先社後郊先嘗後禘為序邪況既曰祀先之禮通上下皆可行又曰禘惟天子

得行之然則禘非祀先之禮乎此皆措辭不瑩之故亦不足深辯也

通謂右自費隱章至此為第三大節輯釋以此為饒氏說亦引之於此

按章句以自第十二章至第二十章九章為一節皆說費隱通乃於此分節截問政一章終十二章之意斷前後而不之屬此豈朱子意邪迹其說之所自來却是饒氏之意通既勦為已有又泯其所自來之迹

而不之顯使讀者驟觀反若發明朱子意者而實則不然其誣先覺誤後覺之罪又過於饒氏饒氏本以六節分全篇之旨通皆取為已說前二節與章句無甚異處故不之辯自此至第五節皆與章句不同故不得不略言之其是非得失已於篇首辯饒說處詳之此不再述

第二十章故為政在人取人以身章句曰此承上大人道敏政而言也家語作為政在於得人語意尤備人謂

賢臣身指君身 饒氏謂為政在人此人字通上下包君臣而言取人以身之人字却指在下之人作家語者不曉此便改云為政在於得人不知上面人存政舉底人亦專指在下之人乎

按上文先曰人存後曰政舉此人字自是包君臣而言無疑此則先曰為政後曰在人文勢政自不同為政必有主其為者非君而誰下文身字即是指為政者身而言耳既曰為政又曰取人蓋曰人君為政在

於得賢臣而取人之則又在人君之自身也然則此
人字只指賢臣而言可知況此節四句皆粘一字相
連成文取人之便是在人之人修身之身便是以
身之身修道之道便是以道之道以此推之則下文
身字道字皆無二義不應此二人字頓有不同也然
則此人字不包君臣又可知矣且朱子取家語之語
意尤備而饒氏乃謂作家語者不曉此然則非謂家
語不曉乃謂朱子不曉特徵其辭耳饒氏輕於非議

前哲如此多見其不知量也且於得二字安知非王肅作家語時別有所據不但取之中庸而增損之耶但自家語既作之後而彼書不復存耳推此則通天下達道五以下皆為一時答問之辭亦未必皆無所據盡為肅自附會如雙峰之所疑也且王肅去夫子之世已七八百年若本無此二字而肅自增之本非一時之言而肅自合之則後世固可欺也當時之人必有非議之者而其書不得傳於後世矣何待雙峰

而後能疑之耶不知識者以為如何

修道以仁 發明修道以仁如志道據德而依於仁

輯釋亦引之

竊意章句既以道為天下之達道達道非君臣父子之類乎如此則仁便是三達德之一知勇皆不過欲始終成就此仁而已修道以仁即天下之達道五所以行之者三之意引志道據德依仁為證似不相當蓋修道以仁即是有資於仁以修道之謂取人以身修

身以道意皆類此若志道依仁乃是先志道而後可依仁引來證此反似以道修仁然者殊不思中庸此言乃是逆推用工之所本此所謂仁是達德論語彼章乃是順序功效之所至彼所謂仁是成德初不可引彼以證此也覽者詳之

仁者人也章句人指人身而言具此生理自然便有惻怛慈愛之意 饒氏謂此人字正與鬼字相對何以言之生則為人死則為鬼仁是生底道理所以訓人 輯

釋亦引之

以人對鬼之說然乎天下字豈皆有對而後義可明乎通者極力稱贊以為深得章句之意愚則以為章句已極分明政不必如此求奇可也

叢說此章朱子以為皆孔子之言金仁山謂聖人之言簡自仁者人也皆子思之言雜引夫子之言反覆推明之

按此亦因饒說而小變以為說者也饒氏則以為自

天下達道五以下方是子思之言又未知其孰為當也喙喙爭鳴將誰適從不如且以章句為正其詳於辯饒說處見之

饒氏謂此章前賢截從知天斷固條暢然朱子合作一章亦有深意九經與為政相應前面說修身親親尊賢故後面九經節節發明之只是三者為綱目達道便是修身之道達德便是親親之仁知天之知子思只添一箇勇字要之知天以上是孔子告君之辭天下達道五

以下是子思推衍告學者之辭不若分作兩章之為是也朱子引家語為據以為皆孔子告哀公之言家語是引中庸來附會其間極可笑輯釋亦引此說至子思只添勇字過要之以下亦於章末引之

按哀公所問者政也夫子答辭自知天已上不過皆言為政之本在於取人修身而已未嘗一言及所問之政也直至九經方是正答所問之政處今若分為兩章以天下達道五以下為非夫子之言則是夫子

並不答哀公所問直至子思方為補其闕耶愚於孟子離婁上篇及中庸篇首亦嘗略辯其不當合為一章之疑又於此章之末論全章之旨處詳之矣家語不足信之意亦已於前段辯之至於斷然以家語引中庸來附會則愚又有說焉兩漢去周末遠古書猶多有存者攷之載籍可見如何晏時齊古二論尚存趙岐亦及見逸禮而引之以證不孝有三之義今皆不復見矣又豈可因今日之不見而盡意當時之無

有也哉王肅與趙岐何晏世相先後則其纂成家語
篇數不一豈得皆無所據而但事附會以成書耶且
雙峰能知其此言為引中庸來附會亦能盡知其全
書皆引何書以附會否但古人集書欠於羅擇雖司
馬遷史記不免此病謂其間不可盡信則可謂其皆
出於附會全不足信則不可朱子豈不能揆之於理
但務引援而有待於雙峰之正救耶雙峰唯但信一
己之耳目而一切不信古人之耳目故於趙岐所引

亦謂其以意言之則其一切不信家語宜矣又況假如所言則一章之中首尾相應先後相承文意相發血脉相通縱是子思引夫子之言而發明之亦何害其為一章哉雙峰既自言之又必分之可見公論雖不可誣私意終不能克蓋以其平日立異為高之私害之故雖始終首尾判而不續文意血脉斷而不貫亦不暇顧必分為二章以成其立異之高也讀者但以語錄論不當分之意參之則雙峰之謬妄曉然矣

續改

所以行之者一章句曰一則誠而已矣 饒氏謂子思只說箇一乃是引而不發要人自去思量章句一者誠而已矣似乎攙先說破意便不悠長

此意當於後段論豫與前定處併辯之

章句以子曰二字為衍文 饒氏謂天下達道五以下皆是子思說唯三近為孔子語故特以子曰表之非衍文也 輯釋亦引之

此其是否不可知已於前屢辯之更不贅及

饒氏以九經懷諸侯為尊賢之等與或問不同 輯釋
亦引饒說通亦竊饒說為己意

親親是仁仁主於愛諸侯曰懷則愛之意多况諸侯
亦有同姓者豈不是親親之殺然則但當以或問之
說為正 又九經不過是修齊治平之事親親是齊
家事子庶民來百工柔遠人懷諸侯是治國平天下
事自齊家推之以治國平天下則子庶民來百工柔

遠人懷諸侯四者皆是自親親之殺而推之無疑若
尊賢則是賴其道己以修身者故其序在修身親親
之間敬大臣體羣臣則是責其輔己以治國平天下
者故其序又在親親之後四者之前此敬大臣體羣
臣二者所以獨為自尊賢之等而推之也由此觀之
則所謂尊賢之等乃是指治人者而言親親之殺皆
是指治於人者而言豈可混而無別哉或問之分當
矣饒氏蓋不察也

三知三行章句既兼分與等而言又通三近分知仁勇
饒氏門人疑章句之纏絆饒氏曰便是子思之意不
應如此當看從上文來子思云知仁勇三者天下之達
德也至及其成功一也亦未見得知仁勇之分在 輯
釋亦引之

通已畧辯之矣蓋分字等字是從理氣上分別出來
分是性分之分是性中所具之理有此三者之分所
以見之於用則各有所屬知屬知一分行屬仁一分

強於知行屬勇一分以分而言是平而分之如禮記
分無求多之分相似此主理而言也等是等級之等
是所稟之氣不齊故資質有高下之等所以上等則
以知為重而主知次等則以行為重而主仁下等則
以強於知行為重而主勇以等而言是堅而守之如孟
子凡五等四等之等此主氣而言也如此則三知屬
知之分三行屬仁之分無可疑者及其知之成功之
一非強於知行何以及此以此屬勇之分亦無可疑

者今曰亦未見知仁勇之分在豈偶未之思耶自孔子曰生而知之者上也學而知之者次也因而學之又其次也則其等之高下蓋已如此分別矣但夫子專以知言子思兼以行言為有詳畧耳子朱子懼夫學者不知資質不同則用力之所當重者亦不同必將泛然知之行之而不能審己量力由所當重者致力以漸進則終無由以入德矣故因其等之本有高下精別其所當重者而主之以定其高下之等則達

德之旨無餘蘊矣雖然又豈朱子以意言之哉蓋亦因中庸本有此意而言之耳前舜以好問用中而明知好問非知乎用中非行乎知行具於一章之中而專主於知非即生知安行以知為重而主知之意乎回以能擇能守而明仁能擇非知乎能守非行乎知行亦具於一章之中而專主於仁非即學知利行以行為重而主仁之意乎然則以等而言章句蓋以前章之旨釋此章之義尚何疑乎此二者皆只就三知

三行而分別則然爾若又以三近而通言之則三知
主知三行主行此二者依舊只是以分而言蓋三知
三行不同處只在生安學利困勉六字上至於此知
之行之則無不同矣所以只以知為知行為仁不復
分其高下也三近為勇之次此與其知之成功一
也之旨雖若有異而實無不同也蓋生知安行固已
無不知之無不成功矣其曰知之成功之一者正以
學知困知者能好學以求其知且以未能知之為耻

而勇於用力則其知之亦當與生知者一利行勉行者能力行以求其功之成且知未能成功之可耻而勇於用力則其成功亦能與安行者一耳生知安行則勇之至也學利困勉便只可為勇之次如三近之云是已豈三知三行之外別有三近之謂哉何纏絆之有子思之言又何不應如此之有看從上文來又何嘗不如此哉餘於後段盡之

章句以等而言發明如舜之大知以知為主如顏子

之克已復禮以行為主

竊意只當以中庸證中庸為易見舜好問用中而明知回能擇能守而明仁非即以等而言之者乎已於前段詳之此不再述

饒氏謂生知知也學知困知近乎知也安行仁也利行勉行近乎仁也生知安行勇也困知勉行者以不及學知利行者為耻學知利行者以不及生知安行者為耻以造乎知之成功之一者近乎勇 輯釋亦引之

此說即章句意耳雙峰只因不詳章句通上文而言
以下三句之意故疑朱子為三知三行之外別有三
近之事遂疑章句之纏絆耳殊不思章句則三知為
知三行為仁二句便是上文以分而言之意三近為
勇之次亦只是上文所以至於知之成功而一者勇
也之意但上節已知之成功乃勇之至此獨自學利
以下求知之成功者說故曰勇之次耳或疑知之成
功而一亦已包學利困勉而言既為勇而不言次三

近正是學利困勉所以知之成功之由乃獨不得為
勇而為勇之次何歟蓋三知三行不同處只在生安
學利困勉六字上由此觀之則知之成功而一是就
已至處言故即可以為勇好學力行知耻是就方求
處言故但可為勇之次尚何疑乎饒氏不察已至與
方求者不同遂以知耻以造乎知之成功之一者為
近乎勇是以已至者與方求者為無別也此則自為
所纏絆而不自知反以章句為纏絆可乎餘則愚

前段之說詳矣

叢說子曰二字非衍文上知仁勇兩節子思自言此引孔子言以定其意又謂知斯三者章句以為三近此處似指三達德不獨指三近

二者皆蹈襲饒氏之意以為說既辯饒則不必辯此矣饒說見後

饒氏謂且知仁勇皆達德也而以知為上仁為次勇為下恐皆未安

此正所謂理有未明而不盡乎人言之意者也使朱子而曰安行之仁不如生知之知聖人之勇不如安行之仁就次下二等之中亦各如此分別則誠有如所疑者令章句自以生知安行者主知為上學知利行者主仁為次困知勉行者主勇為下愚故謂以等而言是主氣說雙峰但以理言故不達耳殊不思德性本無不同因資質有異而德性所當重者有不可同耳何害其為雖未嘗不同而亦不能不異雖不能

不異而實未嘗不同乎且如所疑則篇首以舜明知
回明仁子路明勇然則謂知仁勇皆達德也遂以舜
之知回之仁子路之勇皆無高下之等可乎盖有不
待辯而自明者

力行近乎仁 饒氏謂此以力行言仁前章服膺勿失
又以守言仁何也曰以擇為知則當以守為仁以知為
知則當以行為仁各有所當

擇與守是兼理欲言之知與行是專以理言之恐誤

認人欲為天理故當擇恐天理為人欲所奪故當守
故曰兼理欲言窮理無一毫之遺方是能知循理無
一毫之欠方是能行故曰專以理言其實能擇方能
知能守方能行非有二也

續
添

饒氏謂知斯三者是總上面三達德正是分別或生而
知之以下等語章句以子曰為衍文遂以三近為勇之
次輯釋亦引之

以下文知所以修身之言推之則知所謂斯三者為

指三近而言無疑生知安行是性之之事蓋身不待
修而德無不全者也修身便從學利以下說起了非
三近而何況雙峰既謂子曰非衍文而又謂斯三者
是總上面三達德文勢亦不順章句何可疑之有叢
說宗饒而不信章句過矣叢說在前

饒氏謂章句呂云所入之塗雖異所至之域則同愚謂
入異至同如康節因學數而知道昌黎因學文而有見
於道之類是也若三知三行之所以異特以資質有高

下而用力有難易爾其學固同一聖人之道也何謂所入之異邪

此亦朱子所謂理有未明而不盡乎人言之意者也蓋呂說所謂異者非自南而入自北而入之有異特曰自近而入自遠而入之有異耳蓋生知安行則即此而在無所謂入無所謂至矣學知利行者則未能即此而在必得其塗而入然後可由之以至其域爾較之生知安行即此而在者其所入之塗固有遠近

之異矣困知勉行者又必由困勉而後可比於學利
又自學利而後可以上同於生安方其自困勉始進
之時其所入之塗固與學利者有遠近之異矣及其
可比於學利猶與生安者有間不謂之異可乎道譬
如王者之都生安則居於王都者也學利則自近郊
進入於王都困勉則自遐方進入於王都者也呂氏
之意以此觀之雙峰可無疑矣

集成蔡節齋曰三知主知三行主仁三近主勇云云安

行者仁之仁利行者知之仁云云

按仁之仁上字當作知知之仁此知字當作仁諸編
皆誤讀者詳之

九經尊賢親親章句然必親師友然後修身之道進故
尊賢次之道之所進莫先於家故親親次之發明道
之所進進字欠妥只當說推行之意輯釋亦引之

按進字即是應上文則修身之道進之進字而言乃
進道進德之進亦未見所謂欠妥處若但改為推行

之意政恐要有餘而味不足耳

凡事饒氏謂章句云凡事指達道達德九經之屬愚謂
凡事疑即下文言行事道是也又謂云云只言凡事豫
則立而每事皆欲其前定明萬事莫不有要也 輯釋
亦引此說

按章句於下文言行事道處云此承上文言凡事皆
先立乎誠則饒氏愚謂之疑可釋矣至以凡事為每
事萬事是又以章句指達道達德九經為不然也此

則語錄中已辯之愚矣庸贅況之屬二字於每事萬事之意已無不該尚何疑乎章句正要見言行事道大綱不出達道達德九經之外則先後血脈貫通而雙峯反以為病亦異乎朱子之見矣

饒氏謂豫與前定朱子都把做先立乎誠說得太迫上面達道達德九經皆曰行之者一皆引而不發不說破是誠到前定處何嘗便以豫與前定為誠只如在下位不獲乎上民不可得而治獲上便是前定如信友順親

誠身明善皆是前定末梢雖說個誠身又兼明善言之
輯釋亦引之

按章句曰此承上文言凡事皆欲先立乎誠如下文
所推是也知所推二字之旨則雙峯所疑可冰釋矣
又况子思所謂一所謂豫所謂前定雖引而不發然
必有所指章句之作正欲指示學者不謂之誠則將
謂之何哉若章句亦但引而不發學者毋乃不得其
門而入歟况學者因章句以誠言之便知子思何不

言誠而言一言豫言前定則其引而不發之意可想而見如何要章句亦引而不發得兼之獲上信友順親皆未是根本所在直推至於誠身然後為至耳明善亦所以求誠其身而已順親信友獲上皆誠身之效耳誠身之外又豈他有順親信友獲上之根本哉誠身非豫與前定而何章句所謂凡事先立乎誠如下文所推者蓋謂是也觀於孟子居下位章集註游氏之言曰欲誠其意先致其知不明乎善不誠乎身

矣學至於誠身則安往而不致其極哉以內則順乎親以外則信乎友以上則可以得君以下則可以得民矣詳此可見根本只在誠身處之實矣雙峯尚何疑乎然雙峯異日亦云言而非誠則誕妄也云云道而非誠則無所根本考易窮文先以莫不先立乎誠一句發之語意與章句無異何其與此自相矛盾也合而觀之其說不攻自破矣

饒氏謂章句云此章引孔子之言以繼大舜文武周公

之緒明其所傳之一致云云愚謂子思引孔子之言明費隱之意者至第十九章而極至此則語意更端恐不當遂謂其有發明傳授一致之意也 輯釋亦引之

此一則欲成就其六節之分二則欲成就其天下達道五以下非孔子言之論耳要之一篇之中雖引夫子之言不一至此一章論脩己治人之道極為詳備又承上三章方論舜文武周公之事而發是固不無發明所傳一致之意蓋與堯曰篇以子張問政之言

繼堯舜禹湯武之次離婁下篇以孔子脩春秋繼舜禹湯文武周公之事盡心下篇以孔子繼堯舜湯武之統者同一意爾今曰此則語意更端然則彼皆非歟讀者宜必有見於此許氏叢說第三十章所論甚當可考

有弗學學之弗能弗措也云云 通謂有弗學學之之字當句絕蓋以上文博學之五之字下文人一能之四之字例當句讀絕也况五之字句絕尤為有力

按章句釋此節之意曰君子之學不為則已為則必
要其成然則不為則已一句說有弗學意為字說學
之意則必其成五字說弗能弗措也之意推此以
例其餘則似當於學問思辨行上五字句絕五之字
着讀五也字句絕如斯而已通以五字為句不曉其
說

章句此章引孔子之言以繼大舜文武周公之緒發
明按堯曰章歷叙堯舜禹湯武王之事而以孔子答子

張問政繼之子思此章政此意也

發明既知如此而於饒氏六節之分以此章語意更
端不當遂謂其有發明傳授一致之意五達道以下
不是孔子之言諸說又皆引置編中可謂主見不定
採擇不精也已

發明按饒氏說與章句不同者亦宜知今載於下 輯
釋亦載饒說及發明此語

發明既自以勒為一家之言則當存其說之善者其

似是而非之說則當辭而闢之以曉後學若以其說為優於章句則亦當明其如何是優之實乃可存爾苟得其實何畏於朱子何私於饒氏存之乃公心耳今皆不然而但兼存異論以眩學者依違兩可無所折衷豈不有愧於發明名書之義乎愚故謂其信朱子不如信饒氏其於饒說每口非而心是之者此也如此等之存正是私於饒氏又畏朱子而不敢明言之者也至若所存饒說之是非得失愚已歷歷辯之

此不再述

通謂章句云第十六章兼費隱包大小而言此章包費
隱兼小大何也曰十六章則兼費隱而言不言小大而
包小大於其中此章則兼小大而言不言費隱而包費
隱在其中 輯釋亦引之

按此說似乎得之但語為不詳猶未知其細辯兼包
之義則又如何耳至曰此章不言費隱則似乎有碍
此章不言隱耳未嘗不言費也愚則以為兼則二義

並列一章之中而不可紊包則一章總該二者之義而不可分蓋兼有限包無窮兼是本章所自有包非本章所有亦不但中庸一書所有凡是天地間道理此章無所不包雖中庸中所言不過亦是天地間道理亦在其中耳且以兼之一字言之則各章但言費而隱在其中不可以兼費隱言也各章言小則不言大前三言大則不言小後三章亦不可以兼小大言也惟十六章言鬼神之事以不見不聞與體物如在二

者並列於一章之中則不見不聞正是隱體物如在
正是費故謂此章兼費隱也二十章以文武之政治
天下國家之九經與脩身事親知人三知三行三近
擇善固執等事並列於一章之中則政與九經正是
大脩身事親等事正是小故謂此章兼小大也此二
者皆本章自有其義則所指固有限矣若以包之一
字言之則十六章只是體物之一言可以包大小二
十章只誠之一字可以包費隱蓋十六章說鬼神之

費處不外乎體物之一言而體物之一言則於費之大小可以總該之矣陳定宇所謂體物不遺總而言之所該甚大即一物言之亦鬼神為之體茲非小歟

陳說見第十六章末

其言可謂至明白矣非體物一言可以包

大小之謂乎二十章答問政之言雖非一事然皆不外乎誠之一言觀於達道達德九經皆言所以行之者一與章末語誠始詳之意可見則誠之一言於道之體隱用費可以總該之矣參以或問論誠為此篇

之樞紐處有曰費而隱者實理之用廣而體微也此言可謂簡而明矣非誠之一字可以包費隱之謂乎此二者皆是包涵天地間道理非一章一書所自有者則其所包無窮可知矣蓋費隱大小是天地間道之體用特聖賢於中庸言之耳豈中庸所得專哉然則雖本章所兼有者不過亦是天地間之道理在無所不包之中況其所謂包者又豈可但就一章一書求之而不知其為包涵天地間無窮之理乎

叢說兼者並舉之辭包者涵容之謂蓋十二章之後至十九章各舉費之小而隱在其中十六章獨言鬼神直以隱者言之然所謂不見不聞是其隱者體物如在則亦費矣故曰兼費隱體物不可遺是鬼神之老者下獨指祭祀而言是鬼神之老者故曰包大小是於費隱之中包小大也二十章達道達德九經凡事前皆一言言之是其小者後專言誠是其大者故曰兼小大前所指羣目亦費矣而隱固在其中至於誠一節全以理言

豈非隱者然所謂聖人之天道學者之人道又豈駕空
言理而道事耶故曰包費隱是於大小之中包費隱也
諸章費隱之中有小大故兩費隱字皆在上上十六章
鬼神先言大後言小故曰大小二十章先言衆目而後
言誠故曰小大

按兼包費隱大小之說人人不同愚既因四書通之
說詳言於前矣然未敢自謂必得朱子之旨故備載
許氏此說以俟觀者擇焉但許氏此說亦有可疑處

請畧辯之夫既曰兼並舉包涵容則兼包固有異矣
及至釋包字之義又皆即是並舉之意不見所謂涵
容之說何也其以體物為大祭祀為小即十六章發
明之意愚已於彼辯之矣且叢說既以體物祭祀分
大小則大小皆只是費矣而又曰於費隱之中包大
小豈不見不聞之隱亦有所包之大小耶二十章達
道達德為小可也九經是為天下國家之事亦謂之
小可乎若欲分此章孰大孰小之義當以前三章後

三章例之與前三章同者小也三知三行三近之屬是也九經則非此比矣與後三章同者大也捨九經將何以當之而以此為小耶以誠為大似矣然則小處不可以誠言耶且既以誠為大又以誠為隱則大是費之大乃以隱當之可乎意者誠之一字自可以該貫大小費隱之義而不可偏主也叢說亦自覺其有此病故又以天道人道又豈駕空言理而遺事之言救之殆孟子所謂遁辭者乎凡此皆叢說所可疑

處識者此必有以辯之至於大小小大之序不同則章清所先生以為鬼神章是就造化上言故先言大問政章是就人事上言故先言小姑記於此云

全章之旨 饒氏謂中庸自天下達道五以下恐只是子思之言子思常來只為學者說所以說居下位起若孔子告哀公則未必說居下位及取友等事

雙峯以說居下位為疑愚於孟子離婁上篇畧辯之矣謂天下達道五以下為子思之言愚亦於前屢辯

之矣今請通論二十章全章之旨以明之按哀公問政問政者問治人之事也夫子答之自人存政舉至於不可不知天下凡五節皆所以明治人之本在於脩身也下文自天下達道五至三近三節蓋詳言脩身之道脩身之道盡則治人之本立矣知斯三者一節是結上起下之過接處下文九經四節却正是詳言治人之事即哀公所問之政也凡此以上皆為人君言之耳然治人之事非人君一己所可自為也必

在於取得其人而共治焉可也凡事豫則立一節又是結上起下之過接處下文在下位一節是說人臣欲輔上以治人者其本亦在於脩身而已明善誠身則身脩而有可以獲上之實矣下之所以獲上者在是則君之所以取人者亦在是然則此一節正是終章首為政在人取人以身之意至此始露出誠身一誠字則知上文數節所謂一所謂豫所謂前定皆是指此而言耳如此則為人君為人臣凡有為政治人

之任者皆當以脩身為本而脩身皆當以誠為要也
故下節遂言誠與誠之者以見誠有二者之分誠者
則無工夫誠之者則有工夫章末三節正是誠之者
之工夫凡欲脩身以為治人之本者皆當如此用力
是固通君臣上下而言也欲知雙峯所言之得失者
盡以是推之

四書管窺卷七